

貞松老人遺稿

遠海吟及續

吟

潘恩元題



武進楊芝田評陸放翁詩曰詩非詩人之所能爲也旨哉言乎蓋詩人求工於詩者也求之愈工則愈不工非不工也愈工愈失詩之眞耳書曰詩言志傳曰詩以道性情有是性情乃有是志有是志乃有是詩是固求足于己而無貸於人者也鑄琢摹擬自方作者奚翅自汨其志而自滅其性情哉貞松先生天擅淑姿早歲撰述輒驚長老出遊四方涵揉無盡百家衆氏遇目皆辨舉凡 天府之珍祕遐荒之銘泐一經手輯而論定之海內外人士胥折衷焉顧嘗語余曰學以明倫翼教爲宗讀書而不能輔世君子譏之曩仕京曹位不過五品目擊時事日非恆深憂切論與當道齟齬國變後孤憤莫遏本其忠孝之性以成獨往獨來之志固有自喻而非人所能喻者跡其自辛亥以迄壬申其間放棹東瀛秉筆 南齋深宵微服從 幸析津霜天單車重奠 神域若殫述而鋪陳之其足感人之心思而發爲歌詠者其篇什可逆計耶茲編所錄僅四十五首以視放翁古今體不下萬餘篇多寡各別而一驗之性情與其志則皆息息與寤寐相通悵望千秋同一灑淚論其詩知其

人當恍然于其詩皆非詩人之所能爲矣放翁讀少陵詩曰後世但作詩人看使我撫几空咨嗟又言藏書萬卷讀至老固願少出蘇黎元先生之詩曰蠢蠢含生諸劫換怵怵孤抱幾人同又曰那堪齒鬢都搖落尙見黔黎就翦屠何聲氣之同而應求之不隔也若此此曷有多寡之足云獨以古今搖搖不可合并獨行而無侶是非而無與同言之而聽者誰歟唱之而和者誰歟其所冀待者何如而其堪慰藉者何在乎撫時感事長言詠歎乃約之單簡短冊中性情與志猶之放翁而其心乃愈傷已余讀其自叙以志吾悲一語忽亦不覺悲之從中來也夫余與先生身世豈有二哉時康德二年日在東井許汝棻書

遼海吟

予不工韻語少日所作輒隨手棄去歲在辛未一年間乃得詩三十首兒子輩錄存篋衍衰年望治情見乎辭蟲鳥之吟非求傾聽過而存之以志我身世之悲而已松翁

元旦口占

二十年來國步頻握蛇騎虎閱艱屯低回苦憶承平日遲莫俄驚大地春尚有故人同漢臘且斟栢酒誦 皇仁但期早勒湘江石皂帽何妨老海濱

疊前韻

急景殘冬臘鼓頻堂堂歲月付艱屯憂來靈府疑生棘斗轉人間尚有春填海難憑精衛力吹枯全仗彼蒼仁白頭錄錄成何事慚愧三年滯海濱

再疊前韻

蕉鹿人間得失頻衰翁何必卜亨屯橫流汎濫嗟無地老樹婆娑又閱

春民命已如霜後葉天心應念井中仁追蹤王管吾何敢顙首談經北海濱

敬弟和韻三疊前韻答之

開歲奚囊往復頻惟將苦語答時屯天荒地老今何世雪虐風饕不似春救門幾曾聞被髮扶危疇復念當仁白頭兄弟嗟離索安得聯牀北海濱

山齋書感

自出修門萬事非觚稜回望淚霑衣三年遼海羈臣夢十口饔飧處士薇蠻觸劫新天已醉黃農世遠我安歸泥中中露無窮感便欲從今廢式微

歲華

羈旅春來感歲華山櫻吐白柳抽芽我來已是三年住松比初移一尺加野鴿將雛留屋角蜜蜂分種自鄰家羣生蕃息無窮已苦恨吾生却有涯

自述平生爲集蓼編付長孫繼祖書之題四絕句

自計此身甘九死天心特許保餘年
篝燈細數平生事寫入烏絲百幅箋

百歲駸駸感逝川不成一事已華顛
淒涼家國無窮感一度思量一泫然

已從有盡悟無生安問人間利與名
一任藩籬鷺鳩笑此心早訂白鷗盟

膝前喜有讀書孫清白家風望汝存
一語書紳牢記取莫忘祖德與君恩

徧性

徧性明知與世妨推移却又逆衷腸
去齊寧免譏濡滯則足何如早退藏
欲語儼同枚在口彎弓不異肘生楊
山房長日攤書罷一枕依然夢帝鄉

勞生

兀兀勞生六十年行藏幸免利名牽宦因拙退安吾素身爲 君留豈
自全道裂漸稀同志侶時危忍作在山泉魯連蹈海靈均逝履潔懷芳
慨昔賢

夢囈

自笑書迂老可憐雕蟲歲歲守青氊雖無超海移山力能賦車攻吉日
篇酒後悲歌思易水夢中攬轡勒燕然澄清休道河難俟但恃吾心金
石堅

感事

煩冤莫道口難宣杜宇聲聲泣暮天華表未歸遼海鶴深山猶是義熙
年堯心原自輕黃屋臣意能無感逝川每聽汝南鷄報曉何人起舞着
先鞭

得漢石經殘字五百言度之山齋六經堪詩以記之

石經肇熹平妙蹟久淪墜天水刊遺文再毀不可致何意桑海餘大寶
仍蘊地迢迢十年間煌煌四千字三體糾范書七經徵隋志禮從大戴

編詩異毛公次譌字正築薛俗書訂艱隨經後附校文碑未載奏記有
宋昔著錄諸經猶未備我生後古人乃得窺瓊祕避地居岵夷戢影窮
經義翠墨來中州琳琅滿巾笥呼兒同校理含毫考同異及門有關生
千里馳驛騎搜求半載淹先後六經萃且同魯壁藏未可連城易神州
豺虎肆人倫弁髦棄羣生鋒鏑餘六藝秦燔嗣斯文出重泉天心儼昭
示經正庶民興吾衰尚可跂

野處

野處忘年月崇朝掩華門山深無溽暑樹老出孤根溝壑平生志冰霜
吾道存亂書周四壁賴汝伴晨昏

挽素庵相國

孟夏津門別淒涼首重回大星驚遽隕凶問忽飛來未信河難俟于今
棟竟摧乾坤尚榛莽賁恨到泉臺
裹革平生志沙場萬里行艱難百戰後浩蕩一身輕異域欽奇節窮途
更遠征時危臣靡在海內仰長城

再值都門變沈疴日夜深陳謨豺虎地累疏老臣心緘默情逾苦噍瘖
口已瘖渡河聲尙壯一旦慟人琴

海外瞻韓日於今十七年執鞭新仰止撰杖得周旋遠別情難隔論交
晚更堅草間嗟後死掩袂淚如川

栖栖

莫笑栖栖老禿翁一生總在百憂中四方靡聘思迴駕卅載無家類轉
蓬不寐自傷常耿耿視天敢謂竟夢夢馳驅矢竭平生力倘許精誠感
吳穹

一月中四赴盛京紀事

王蹟基東土山川拱舊京威稜思列聖翊戴想羣英歲晚慙棲隱途
危屢遠征縱橫戎馬地義重此身輕

贈熙格民軍使

九宇分崩日黃圖再造年邠岐垂澤遠雷雨起龍潛丕烈承先聖維
城有後賢艱難勤翊戴指顧畫凌煙

落木

又是西風落木時
歲華如駛況吾衰
壯懷欲射南山虎
危境頻臨半夜池
鴻雁不來鄉信杳
海天遠望客心悲
夢中磨礪天齊石
此願平生倘可期

海天

海天兮遼闊
美人兮天末
期逝兮不至
勞心兮怛怛

阻長

白露蒼葭水一方
懷君不覺減容光
如何咫尺成千里
坐使詩人歎阻長

書悶

山齋坐雨涼如水
安得尊前笑口開
欲寄遠書無雁至
偶因投筴說朋來
霜林撼撼秋將老
華髮星星志未灰
欲訴情懷向誰語
更闌顧影獨徘徊

五次渡遼

敝裘席帽走風塵敢以衰庸恕此身大野雪飛增曙色遼河冰合少行人
虛名乃下黃巾拜暮齒還逢醉尉噴此皆事實他日堯衢歌擊壤老來辦
作市塵民

六次渡遼

持節河西使寶融輶車又走朔風中敢言蓄艾三年久尙少爲山一簣
功蠢蠢含生諸劫換忉忉孤抱幾人同繩牀睡穩村醪足輸與茆簷曝
背翁

辛未季冬以時事拂逆憂懣致疾 聖上不加嚴譴轉命駕臨視
殊恩異數感激悚惶賦此恭紀

臣罪當誅死亦宜思量便欲謝秦醫敢言捧日心無貳妄冀同天事轉
歧自分殘生投遠裔乃承 溫諭感淪肌 殊恩異數何由報數徧魚
更淚滿頤

附壬申以後詩 十五首

滿洲建國我 皇上以耆舊堅請不忍峻拒允以舊君暫領執政

以三月三日受政舊臣別爲一班朝賀莫不感傷流涕有嗚咽
幾失聲者敬賦一律以記其事

再列朝班泣涕漣貞元舊侶總華顛餘生甫覲偏安日回首彌傷遜
政年鎬邑遺黎重向化神州封豕尙依然吾皇勇智由天錫一怒行
看奠八埏

迂儒

局天踏地一迂儒超海移山意氣麤草草百年來日少茫茫大宇此身
孤那堪齒鬢都搖落尙見黔黎就翦屠欲陟高岡悲險阻年來僕馬久
瘖痛

撥悶

短髮垂肩志未灰狂來時覆掌中杯盈廷疇負匡王略造物應生濟世
才道阻故鄉書問闊夢回孤枕角聲哀九州職貢重修日會見衰翁笑
口開

心身

老去蹉跎百不能冰淵臨履日兢兢心如陷陣長征馬身似羈韉未放
鷹安得英賢持國柄每傷泉路阻良朋焚香遠悼龜堂叟此老平生最
服膺

神京

以下癸酉

鎮日懣歡緒巡廊負手行世情看已熟愁思掃還生溟海鯢鵬遠中庭
鷦雀爭攤書尋復掩矯首望神京

疊前韻寄意不復命題

臥病兼旬外今朝恃杖行寒輕衣屢減春至草還生酒薄難成醉棋殘
未息爭吾衰恆不寐何日夢收京

臘日口占時定議改行帝制

馬足車塵又二年衰齡尙荷主恩偏鴈冠耀首慙無補虎口餘生詎
忍捐畢竟人心思漢臘果然天意啓周宣囊中尙有枯毫在好賦戎車
六月篇

歲除

藥裏供衰病華顛媿腐儒浮雲觀世變流水惜年徂大地猶爭戰吾生
尚道途兒孫因改歲隨例進屠蘇

感逝三律

以下甲戌

國是疑危日回天力萬鈞一身關 廟 社大義定君臣戰績留青史
崇祠照海濱人亡邦國瘁溟渤竟揚塵 劉忠誠公

卅年兼將相與國共安危使節半天下聲華動四夷南疆勤保障鼎足
苦扶持晚歲聞祈死長留百世悲 張文襄公

白下稱戈日都門喋血年丹忱天下仰大義萬方傳驥足悲中蹶松心
老更堅精靈應不泯遺恨幾時蠲 張忠武公

步夢虛老人見贈韻

津梁疲已久行止兩仍難花落蜂猶鬧巢營幕未安從游宜鹿豕聯立
媿鵷鸞燈下披青史興亡著意看

東方有一士

東方有一士乃以憂患生早歲厭藜藿夙志輕簪纓妄希管樂儔不顧

儕輩驚日夕誦流略風雨親短檠三十出負米甘旨不得營萍梗泛江海虛譽動公卿彈鋏豈身謀被褐憂亂萌四十通朝籍六載居王城蒿目閱世變無田可歸耕履地虞維絕戴天愁柱傾果然朝市改攜家浮滄瀛流庸歷八年孤抱徒硜硜元凶伏天誅皂帽還舊京麻屨叩 天闕重得侍 承明妖星指 帝座 禁籞聞鴉聲負羈趨津沽恐懼搖心旌居然出虎口彼蒼鑒微誠寧無孤注嫌撫膺實怛怛待罪不加誅帝量誠恢宏五載客遼東天意驅長鯨鄰邦感輔車敦槃尋舊盟倉皇戎馬際皓首復長征豐鎬王氣在日月重光瑩後來民其蘇如醉得解醒回首望中原仍肆蠻觸爭哀哉神禹蹟千里無鷄鳴翹首俛王師何日指幽并匡國望吉甫收京祝西平由來成大厦詎以一木撐小臣斗筭器所受亦已盈矧迫懸車年止足當辭榮露香禱昊蒼倒懸解疲氓更冀我寮案念亂矢忠貞吾 皇得賢輔永奠四海清天心本仁愛倘得慰中情此懷果獲遂萬事鴻毛輕

羸翁年七十羸劣固無比六極得其三憂與貧弱是非惟體質孱才力亦復爾中歲歷艱虞偶亦不自揆頓若忘駑駘超騰追驥駟有時效愚公太行培塿視臨義氣奮張逾時力已弛曾無纖芥勞垂老得膺仕高厚苦難酬顧影慙冠鴈矧念生民艱彌懷素餐恥才拙斯畏榮非敢賤朱紫先聖訓陳力老氏戒知止終當乞餘年晚節詎可委乘化會歸盡微軀亦敝屣七十非云天早已了生死老健不可期天君幸無滓寡欲保所存斯言有至理小炷留殘燈庶幾養生旨

題寶沈庵宮保西山探杏圖

話到春明已斷腸披圖怱悵惜年芳放翁老去心情減猶爲看花憶洛陽

予詩本不足存存此方寸之所懷而已龔海峰有句云長篇短什都無賴百轉千回只此心若爲予言之爰書卷末用諗方來乙亥五月松翁又記